

■ CONVIVENZA

La vardad, la spira vardad

DA VIOLA CADRUVI

E lura? Co eri? – Serius? Vuls propi savair? La vardad, la spira vardad? Bun pia. Jau al tradesch. T'imaginescha da chajar ora ina nusch da cocos. Lura vegns forsa datiers da la chaussa. Igl è scheisse. Nagut legher, nagut bel. Simplamain brutal. Primitiv.

I dat dunnas che romantischan u che embellestan per betg far tema a mammas en spe. Ma jau crai ch'i saja meglier dad esser sincera. L'entschatta han ins forsa il sentiment che las deglias sajan anc supportablas, che quai giaja schon insaco. Ma na ta lascha betg cugliunar! I vegn adina mender. T'imaginescha la mendra dolur che ti enconuschas e la multiplitgescha cun diesch! Nun che ti hajas ina giada gì craps dals gnirunchels, gliez è tegn jau sumegliant. Mintga deglia ta stgarpa dapart. Mintga centimeter che la bucca da l'uterus s'avra è in cumbat cunter l'agen corp. E quai uras en ed uras ora.

I nteressantamain n'en las deglias da pressiun (quellas a la fin) gnanc las mendas. Lura pon ins almain far insatge. Ma avant ch'ins cumenza a smatgar dastg'ins mo giaschair là ed empruvar da respirar devant il mal. Tge ballas. Sco sch'ins pudess respirar devant in mal talmain brutal. Quai è sco sch'ins empruvass da respirar la nusch da cocos gia numnada.



J au poss sincerar: cu-deschs sco «La naschientscha autodeterminada», «Naschientscha plain plaschair – orgassem durant parturir» u «Hypno-birthing – la via natirala ad ina naschientscha simpla e leva» èn grascha. Po esser che talas naschientschas existan. Ma segir mo darar. En general èsi meglier da quintar cun il mender. Uschiglio datti mo nau-schias surpraisas.

J au sun per cletg benedita da cun in natiral remartgablamain pessimistic, n'ai betg legì tals cudeschs ed uschia hai jau quintà cun las mendras dolurs da mia vita. Tuttina hai jau smaladì mamezza durant la naschientscha. Pertge dianter sun jau ida en la chasa da parturir nua ch'i dat nags analgetics, enstagl dad ir en l'ospital e ma sfundrar en ina PDA? Ed jau aveva ina naschientscha fitg simpla e nuncumplitgada. Almain tenor la spendrera.

Ma suenter hai bain valì la paina? – Oje. Jau schess uschè gugent che

quai saja vair. Ch'i dettia quest mument magic suenter la naschientscha, cura che ti tegnas en bratsch tes poppin e tut è emblidà. Ma nus na vivain betg en ina paraula da Disney. E quest mument n'exista betg. Almain betg per mai. Quests sentiments imposants che surtunan tut? Questa inundaziun dad emoziuns? Invenziun masculina, idealisaziun posteriura. Suenter la naschientscha er'jau simplamain total groggy.

N atiralmain er'jau im-mens ledä, gea forsa perfin in pau euforica. Ma betg pervia da la poppa, mabain perquai ch'jau aveva dumagnà la chaussa. Mes maraton. Mes piz da 4000. Pir trais dis suenter la naschientscha hai jau guardà sin mia poppa è tutte-nina pensà: Oha, ella è gea anc ina gnocca. Suenter traiss emnas lura: Ach, sch'ella stess mo adina uschè pitschna. Ed ussa na poss jau betg pli guardar criminis, perquai ch'jau ves en mintga uffant en privel mia pitschna. Ils sentiments vegnan pia schon. Ma la vardad è: Lezs fissan segir era vegnids senza las dolurs.

*Viola Cadruvi ha studegià germanistica, istoria e rumantsch a l'Università da Turitg. Mintgatant lavura ella vi da sia dissertaziun e mintgatant sco scolasta, ma bunamain adina scriva ella.

La convivenza da linguas e culturas en el Grischun. Quai è il tema da la convivenza che cumpara mintgamai glindesdi en La Quotidiana ed en la Südostschweiz.